

Oficina di Monumento ta restaura grafnan di Comandeur na Hato




ORANJESTAD (AAN): Na November di aña 2004 Oficina di Monumento a cuminsa cu restauracion di 16 grafnan di comandeur na Seroe Patrishi. E trabao aki a termina den luna di oktober 2005 na momento cu a blancha e grafnan aki como mantencion.

Awor, entrante 31 di juli 2006, ta toca turno pa e grafnan di Hato tambe worde restaura. Den total, tin 23 grafnan na e lugar aki. Alavez e tereno tin actualmente dos cura. Uno ta di balor historico y e otro ta di waya di hero cu ta completamente deplorabel. E grafnan historico aki ta situa net na banda di EPB-Hato y ta den hopi mal estado.

No tur e grafnan ta di commandeurnan pero, door cu hopi di nan ta poni den grupo, esaki ta indica cu varios familiar tambe ta dera aki hunto cu nan ser keri. Tampoco ta conoci exactamente, ken tur ta dera aki, pasobra tur e plachi di nombenan a desaparece.

E idea pa restaura e grafnan aki a origina cerca sr. Ronald de Kort, di e Representacion di Hulanda na Aruba. Despues cu sr. de Kort a acerca Oficina di Monumento, e ultimo aki a prepara calculo di gasto y un proposicion pa e proyecto. Minister di Cultura, sr. Ramon Lee, a duna tur aporte na Oficina di Monumento pa prepara y ehecuta e proyecto den cuadro di maneho integral pa cultura. Representacion di Hulanda a bay di acuerdo pa financia e proyecto pa un suma total di alrededor di 30 mil Florin Arubiano.

E trabaonan di



restauracion ta encera: restaura e 23 grafnan y e muraya historico, haci e tereno limpi, y traha un cura nobo di bloki. E trabaonan di construcion lo worde efectua door di Brema

Construccion bou supervision di Oficina di Monumento mes. E proyecto ta proyecta pa termina na December 2006 si tur cos bay segun planea.